

Egn relasch vean fatg public

La Cuminanza Culturala Val Schons (CCVS) â organiso egn'exposiziùn a la vendita digls maletgs digl Jakob Poltera (1923 – 2001). El eara egn digls davos tgavriers da la Val Schons a veva egn passiuùn c'el â per scurvato an la vigliadetgna: igl malagear.

STEFANIE ELSA/FMR

An anur digl Jakob Poltera (1923 – 2001) â liac egn'exposiziùn igls 17 da favrer a Pignia (varda stgafa). Mo tgi eara que um a tge ovra â el relascho?

Igl Jakob «Joggi» Poltera e naschieu igls 23 da november 1923. Trànter igls ons 1961 a 1976 â el partgiro las tgoras digls purs da Pignia. Par diesch ons e igl «Joggi» vagnieu acum-pagnieu da la tgogna «Bellina». Cugl satg-cadoss plagn bünas tgossas da las dunas da Pignia navan els a cualm. Digl zarcladur antocen gl'october âl mintgagi rimno trànter 30 a 60 tgoras ad e ieu cun ellas sei ancünter igl Pez la Tschera (2626 m s.m.).

Digl tgavrer agl pictur

Cugl tains ear'igl adigna ple pocas tgoras. Avànt c'el â partgiro las tgoras a Pignia, vev'el schon fatg quegl da giuven a Calantgil. Là vegi el prest giu 400 tgoras – igl e betga cler scha que diember e corect, near sch'igl e egn schazageada. A Pignia ear'igl alura gl'amprem ànc anturn 60 tgoras. Ple tard me ple 30. La veta sco tgavrer e egn tradiziùn c'e ida a pearder an Val Schon a c'ign tgata oz ànc an la Valragn – dantànt ear là vean igl adigna ple pocas (varda gl'artetgel an la LQ digls 10 d' october 2023).

La lavur sco tgavrer âl alura termino – l'aszensiùn mintga gi sei agl territori anturn igl Pez La Tschera e davantada megna stantusa. Ad igls purs da Pignia ànc ear giu nignas tgoras ple. Ascheia e igl «Joggi» ieu a star cun sia mama a sieus ô a Clugen. Là â el alura savieu far la lavur da caluster.

Gl'on 1990 e igl Jakob Poltera alura vagnieu agl salv da vigls a La Pünt/Farschno (Fürstenaubruck) a per là â el ear antschieit a malagear. Las blearas ragurdientschas positivas ànc do inspiraziùn ad el par igls seas maletgs. Igls resul-

tats ànc incanto la gliעד – gl'on 1998 e'l schizund vagnieu stimo sco «scuvearta nova» agl museum d'art digl Grischùn a Cuira.

Amprander anzatge nov

Malageiu â igl Jakob Poltera vischnancas an calurs vivas, a tut quegl cura c'el e schon sto an la sutga rulànta. Seat ons suainter c'el e vagnieu a star a La Pünt/Farschno âl ànc egn'ea stuieu midar igl sieus stil da malagear. Avànt malageav'el cugl risplei da calur near cun neocolor. Mo parquegl ca la sia vasida e vagnida ple a ple flevla âl antschieit a malagear cun pinel a calurs d'acryl. Las sias ovras â el stgieu mussar an diferaintas exposiziùns ad â ear vandieu egn peer da quellas.

Cugl ratgeav da las vendas â igl «Joggi» alura savieu cumprar par sasez egn ani, ear sch'el e mena sto marido, â la sia curatura raquinto. Ella saragorda ear digl gi c'el e mort: «El â ànc dumando egn servala ad egn stumpa, el â maglieu la liongia a fimo la stumpa a cugls peds: «Ussa vean la glisch clera, ussa vont jou, e'l dur-

mieu aint.» Ear igl sieus giavisch da vagnir sataro a Calantgil â sacumplanieu. Egn um cun egn veta sempla c'â amprieu anzatge nov an la vigliadetgna ad â relascho egn'ovra ca vean ussa puspe mussada a vandida a gliעד interessada.

Jakob Poltera: tgavrer a pictur

Igl davos tgavrer da Pignia, igl Jakob «Joggi» Poltera (1923 – 2001) eara ear ancunaschaint par igls seas maletgs. Sonda, igls 17 da favrer, das las 16.00 – 20.00 uras saragorda la Cuminanza Culturala Val Schons digl «Joggi» Poltera an tgea da scola a Pignia. Sco mimorgia da sia veta dat igl egn'exposiziùn digls seas maletgs, anecdotes ad ear films curts.

Acumpagneada vean la sera cun musica, bavràndas ad anzatge pintg da magliear. (fmr/ste)



Igl Jakob «Joggi» Poltera – c'eara egn digls davos tgavriers – cun las «sias» tgoras.

FOTO ETH-BIBLIOTHEK